

Coengh Vunz, Ndaej Angq

Ngoenz neix dwg cieng coit. Vahsug naeuz: coit co' ngeih bae doh haw. Langh seizneix mbouj okbae youz, couh ienqhoij dahraix! Yienghneix le, daxmeh couh ok geiqmaeuz dingh ndei le, gou caeuq daxmeh vanzlij mehnax bae Sinhvas Suhden cawx saw.

Daj ndaw Sinhvas Suhden okdaeuj, gou fwngz gaem bonj saw simgyaez haenx, doq byaij doq yawj. Byaij bae byaij bae le, sawqmwh din gou dik deng yiengh doxgaiq mbouj rox dwg gijmaz ndeu, gou mizsim yawj haeuj lajdin bae, neix raen aen siegdang hung dangqmaz ndeu youq henz din gou bibuengq mbouj daengx, yienhda lai, neix dwg aen siegdang moq ndeu. Gou yawj seiqhenz, youq giz mbouj gyae, miz aen dan ndeu cingq gai gij doxgaiq neix. Danhseih bouxcawj aendan haenx mbouj rox aen siegdang doek roengz gwnz namh daeuj, liuxle youh deng gou dik dawz lo. Gip hwnjdaeuj roxnaeuz mbouj gip ne? Seizneix ndaw sim gou lumj miz song boux vunziq doxceng nei. Boux vunziq ndeu naeuz: "Yawj maz yawj, neix mbouj dwg aen sieg mbouj dijcienz ndeu ndwi ha? Ganjgip deuz bae, fanjcingq mbouj miz vunz raen, mbouj miz byawz rox dwg mwngz dik deng, noix gienh saeh ndei gvaq lai gienh saeh. Vanzlij ne, daxmeh caeuq mehnax mwngz

gaeng bae gyae lo." Boux vunziq wng ciuq dauhleix ceng naeuz: "Mbouj ndaej, mwngz bungz gienh saeh neix gvaq, couh deng guenj daengz byai bae, mboujne couhdwg boux mbouj miz daudwz nauq. Ganjgip gip de hwnjdaeuj, dawz dauqbae hawj vunz, neix dwg cungj binjdawz ndei ndeu." Gou mbouj ngeix baenzlai, dangseiz yaengx gaemgienz dub coq boux vunziq daih'it.

Gou gaeuz hwet roengz, gip aen siegdang haenx hwnjdaeuj, vaiqvaiq byaij coh aen dan de bae, "Hawj mwngz, neix dwg aen siegdang doek duh sou ba!" Gou lejsing naeuz.

"Wz, gyo' mbaiq mwngz, baengzyoux iq!" Boux gai siegdang haenx, dwg boux mehmbwk ndeu, yawj yienghsiengq de daihgaiq miz samcib daengz seiqcib bi, daenj geu buhhung hoengzmaeq ndeu, byoem de deng rumz ci le mizdi nyungq lo, gou dawz sieg dauq hawj de seizhaenx, de baez lej rig gaeubak doxhwnj, naj mizdi mong riu coh gou. Gij najriu de lumj raemxraeuj ndaw dungx lae doh daengx ndang gou, hawj gou boux lij mizdi dwgliengz neix dangseiz couh raen ndawsim raejruub bae.

Baez neix, gou coengh bouxwnq, yienznaeuz dwg gienh saeh iqet ndeu ndwi, danhseih lij hawj



gou ndawsim angqfaengz bae. Seizneix gou ngeix daengz coenh vah ndaw govwnz《Gauh'wjgih Caeuq Lwg De》ndeu: "Hawj", ciengxlwenx lai angq gvaq 'aeu'!" Gou rox gij eiqsei neix le riu baez ndeu, byaij bae gyaep dawz daxmeh caeuq mehnax.

(Yangz Denhcinz)

Youq Seizcin Ngeix Daengz

Seizcin fwn doekse, raemxfwn roq haeuj gaiq bohli z aencueng bae, miz sing yiengj dikdak dikdak. Gou naengh youq baihnaj daizsaw, muenghyawj rog cueng gij gingjsaek maez-vunz haenx, sim ngeix daengz vunz ndaw ranz.

Gou ngeix daengz yahgeq gou. Yahgeq gou vunz mbouj sang, byoem haumumu, baihlaj miz fouq lwgda ronghliglig ndeu. Gou ndaej geiq de cungj nyaengq guh hongmaecim(hong dajnyib dajsiuq daengi), de itsim nyinh-caen guhhong, yienghsiengq gyaunde lai, neix gou raen de bienq baenz boux unqswnh ndiep-gyawj ndeu. Mizseiz gou raen de dwg boux doiq gou yiemz dangqmaz ndeu, langhnaeuz gou gwn ngaiz seizhaenx mbouj re couh deng naedngaiz doek gwnz daiz, de couh aeu lwgfwngz roq najdaiz yiengj "dung dung dung" mbouj dingz mbouj duenh nei, neix soh daengz gou rox loek le gip naedngaiz hwnjdaeuj de cij daengx lo.

Yahgeq lij lix seizhaenx gyaez gou lailai. Baez bae ranz de guhcaemz, gou cungj boux daih'it cungj haeuj ndaw rug yahgeq bae. Yahgeq raen gou daeuj le, couh got gou haeuj ndaw rungj de bae, daj ndaw daeh de mbon ok gaiq dangzcij



ndeu ndenq hawj gou, liuxle aeu fajfwngz youh hung youh nyounyat haenx rub byoem raezrangh gou. Youq ndaw sim gou, gou raen neix dwg saeh hawj gou sim angq dangqmaz bae. Danhseih seizneix gou baenzlawz hix mbouj ndaej raen yahgeq gou lo, aenvih de gaengq bienqbaenz ndaundeiq mbin gwnz mbwn, deuz aen seiqgyaiq neix bae gizwnq lo.

Fwn seizcin lij doek mbouj dingz mbouj duenh, rogueng ngeiq goliux riengz rumz bi bae buengq dauq, neix couh lumj gij simngeix youq ndaw ukgyaeuj gou baebae dauqdaug nei.....

(Cangh Yizyiz)

Simndei

Baezbaez duzvaiz youq gwnz ndoibya doiqnaj doxdaemj, gou couh raen dwglau lai. Beixmbauq ha, mwngz vihmaz cungj angqvauvau dopfwngz ne? Beix mbouj gyaez gyoengqde doxndei caemh gwn nywj ga?

Boh naeuz, bouxmanzyak cingq gyaez doxmoeb bw. Beixmbauq ha, mwngz manzyak dahraix.

Baezbaez duz gaeqboux ranz dou caeuq duz gaeqboux wng doxdot, gou couh aeu faexgyaengh laeh gyoengqde deuz. Beixmbauq ha, mwngz guhlawz mbouj hawj gou laeh ne? Guhlawz baezbaez cungj dwg hawj gyoengqde doxdot roujnding gwnz gyaeuj ok lwed bae, bwn cungj dot doek rim gwnz namh bae ne? Mwngz guhlawz lij angqvauvau ndwn youq bangxhenz yawj guhcaemz ne? Mwngz haemz gyoengqde doxndei caez guhcaemz ga?

Boh naeuz, bouxmanzyak cij hozndat bouxwnq doxndei bw. Beixmbauq ha, mwngz yakdoeg dahraix.

Baezbaez daekgaeuj youq ndaw nywjcaz guhfwen, gou couh angqvauvau. Hoeng, beixmbauq ha, mwngz guhlawz baezbaez cungj gaeb daekgaeuj daeuj gyaeng haeuj ndaw hab'iq bae, lij ciengzseiz coq gyoengqde haeuj ndaw batnaj bae hawj gyoengqde doxhoenx ne? Daekgaeuj doxhoenx yied yak, mwngz couh yied angqfaengz. Gyoengqde doxhaeb ga cungj raek liux, beix couh angqvauvau. Vihmaz ne? Beixmbauq ha, mwngz haemz daekgaeuj youq ndaw nywjcaz angqvauvau guhfwen ga?

Boh naeuz, bouxyakdoeg cij baengh sieng vunz guh'angq bw. Beixmbauq ha, mwngz yakdoeg dahraix.

(Daj 《Bonjsei Sim Lwgnyez》 (Veiz Gizlinz raiz) senj okdaeuj, Lwgfwngzmeh/卢奋长 hoiz)

